



## QVÆSTIO MEDICA

QVODLIBETARIIS DISPVATIONIBVS

MANE DISCVTIENDA

IN SCHOLIS MEDICORVM

Die Iovis 17. Novembris.

M. PHILIPPO MATHON, Doctore Medico, Præside.

*An intermittenti Tertiana contumaci Balneum?*

## I.

FEBRIS ut morborum omnium frequentissimus, ita & maximè periculosus: cordi quippe assiduo vitæ custodi bellum præsertim indicit, cui cæteri vix unquam aut rarò admodum infensi sunt: Igneus calor cum vitali exitiosa hæc viventibus odia & graves exercet inimicitias, licèt ab eo non specie, sed solo nocendi animo sit alienus; imprimis verò ubi se huic bello accinxit, arcem nativi caloris ita oppugnat, ut incendia statim minitetur, adeo sanguine & spiritibus accensis flammæ per latentes ductus in universum corpus humidi benignioris populatrices spargit, ut functionum omnium ministeria turbare, cætera symptomatum mala creari, corporis *ὀυλαμελίας* labascere, ac naturam tandem obrui aut fatiscere videas. Alium porrò febris authorem à calore extraneo ne quæsieris, Epialas iste, Lipyras, Syncopales, horrificasque inducit, in quibus ægrotantes assiduo frigore torpent, aut concutuntur rigore: usque eò pervicacem illum natura hostem experitur, ut vel in dediticiam sæviat, dum nec eos adhuc dimiserit, qui frigidum cum animâ spiritum exhalant. Non uniusmodi autem est mala caloris istius indoles, sed ut quæque diversa est corporis cui inhæsit ratio, aliàs Ephemeram parit, si nempe spiritus flammæ-

tur, eodem quo primùm exarsit die extinguendam : aliàs putridam, ubi foedum hoc humores vitium contraxerunt, ignem diutius in materiâ crassiore servaturam : aliquando etiam hæcticam invehit, vix nisi deficiente pabulo, quod ipsissima est solidarum partium substantia, desituram : Nec mireris nativum ipsum calorem implacabiles velut in iras exardescendentem ipsi naturæ insensum reddi, immò, ut sunt iræ fratrum acerbiores, scito eò ferociorem febris naturam induere, quo vegetior ille cuique nascenti obtigerit.

## I I.

**N**I HIL in rerum ortu & interitu putredine frequentius, occultius nihil, nec in explorandâ febrium naturâ, tentandâ curatione perito medendi artificii quidquam utilius : Naturalem nonnulli, ægrorum propriam alij agnoscunt ; illa ab interno rei cujusque principio manare creditur, ut marcor in plantis, senectus in animalibus, hanc externa atque insalubris causa procreat : Hujus veram aptitudinem ideam expresseris, si mutationem totius putrescentis corporis substantiæ ad corruptelam à calido externo, quam si corruptionem caloris nativi esse dixeris, quæ putrescunt primùm calida, deinde humida, postmodum frigida, ultimò tandem sicca percipiuntur, dum in terram, quæ ultimus putrefactionis terminus est, abeunt. Immediatam ac magis frequentem putrescentium humorum causam aliam à transpiratione prohibita ne quæras, & eam puta nedum viventibus adversam, imò ipsis etiam inanimatis lapidibus nimirum ac metallis valde insensam. Quòd si serpat in humores putredinis vitium, febres accenduntur pro diversâ illorum conditione foci fomitisque varietate diversæ. Qui fervent in majoribus vasis succi prout assiduo corruptorum humorum appulsu vicinam sibi vitæ arcem impetunt, continuarum febrium causæ censentur, sicut qui in exilibus remotisque à corde alveolis putrent ob longioris viæ intercapedinem recurrentemque ex intervallis novam *Συμωσιν* interpolatas pariunt.

## I I I.

**I**NTERMITTENTIVM febrium prout manifestas laboranti naturæ inducias præbent discrimina, aliunde non repetimus, quam à corruptorum humorum partes commemoratas obfidentium varietate, hinc quotidianæ à pituitâ, tertianæ à bile, à melancholia quartanæ ortum ducunt ; singulæ quidem legitime dum sincerus putrescit humor, cui si alius societur, spuriam infert;

3  
breviores alię, si humoris à quo procreantur natura ferat, ut tardiores nonnullę; si certo quodam ordine desinunt & redeunt, typicę, sin minùs, erraticę perhibentur; simplices quę unicum focum agnoscunt, ut pro illius numero duplices triplicesque evadunt: at cęteras inter tertianę ut securiores, ita & plerumque reliquis habentur breviores, nam si exquisitę fuerint, septem ut plurimum circuitibus terminentur, nisi morbum efficientis humoris copia, ejusdem crassities, & in penitiori corpore immersi collectio obſistat quominùs expugnari possint. Verùm id potissimum efficere consuevit prava principis cujusdam visceris vel saltem alicui officio præpositę partis diathesis, ut intemperies præfervida, quę putrido miasmate optimum quodque alimentum adurit aut corrumpit, febremque pervicacem ac diuturniorem reddit.

## I V.

**I** N T E R M I T T E N T I B V S tertianis qui rectè mederi voluerit, duplicem sibi scopum constituat necesse est: nam humorum excrementitiorum non modò coërcere putredinem & illius vacuare materiam, sed & internorum temperare viscerum incendium debet; utrumque commodè præstabit phlebotomia & purgatio, illā quidem diffusam per universum corpus causam eam quę incendium fovet, minuyente, hac verò à partibus ipsis in quibus seu focus ignis etiamnum viget materiam subducente, modò nullus in victus ratione error committatur: & quamvis magna sit apud prudentem Medicum ad hujusmodi febrium curationem vis præsidiorum ejuscemodi, hanc tamen non desunt qui spernant ac vituperent, quia rectum utendi modum ignorant; jactitent per inane licèt pulveres suos puriori Medicinę tenebras facturi cinisfones, & singulares prædicent suorum remediorum vires: auscultaverit qui volet imperitę plebi dum asserit periaptis, illigatis nempe collo manibusve amuletis strangularos morbos aut injectas febribus compedes; consultius sanè & ad ægrotantium utilitatem opportuniùs se geret, qui persuasum habebit frustrà vehementiora usurpari præsidia, quoties præsto sunt mitiora, neque ulli esse fidendum curationi quę *alextras* contingere solet; nam si tanta sit febris contumacia, ut nullo laudatorum auxiliorum successu, nonnullo ægrotantium dispendio, nec sine Medicorum opprobrio cæci febrium ignes diutius alantur, balneo statim erit immergenda.

**Q**VI in expugnandâ febrium contumaciâ balneo utitur, tu-  
tò, citò, & jucundè curat, non algido quidem ne cutis spi-  
racula nimirum occludat, non præcalido, sulphureo, aut nitroso,  
ne plus æquo laxatis meatibus in suam perniciem perenni difflatio-  
ne, ut semper, tunc verò maximè ruenti calori nativo patefaciat  
aditum vel humores adurat, sed potabili ex aqua blando debet id  
calore tepescere; domesticum fluviali præstat, nam solis æstus ad  
attemperationem aquæ aut parum efficax aut nimis inæqualis. Pa-  
ratum hac arte balneum bene valentibus appetitionem ciborum  
imminutam restituit, sitim extinguit, fessa labore membra levat,  
in causariis verò dum tenui quo pollet vapore intima corporis per-  
vadit, copiosam excrementitiorum humorum illuviem in alvum  
deturbat, & ad exclusionem aptiorem reddit, densa præter mo-  
dum solidaque emollit corpora, crassa attenuat, rigida laxat, ob-  
structiones referat, acrialenit, aridas humectat partes, præfervi-  
dam viscerum intemperiem domat, hinc nephriticis, ischuria ab  
inflammatione laborantibus, colico dolore vexatis, diuturnis denique  
febris præsentaneum est certissimumque remedium. Cave ta-  
men putes quocumque tertianæ intermittentis tempore salutife-  
rum esse, initio quippe ubi summa viget humorum putrescentium  
cruditas, solertis est naturæ ministri ab eo abstinere, ut provecto  
morbo intermissionis tempore micantibus coctionis signis illud in  
usum revocare.

*Ergo intermittenti Tertianæ contumaci Balneum.*

## DOMINI DOCTORES DISPUTAVRI.

*M. Ludovicus Morin.*

*M. Robertus Patin, Professor Reg.*

*M. Nicolaus Cyprien.*

*M. Petrus Lombard.*

*M. Michaël de la Vigne.*

*M. Nicolaus Richard.*

*M. Philippus Mathon, Praefes.*

*M. Petrus Perreau.*

*M. Petrus le Mercier.*

Proponebat Luteriæ CLAUDIVS BIENDISANT,  
Aquensis, A. R. S. H. M. DC. LXVII.

Ex Typographia FRANCISCI MUGUET, Regis ac Illustriss.  
Archiepiscopi Paris. Typographi.